



REPUBLIKA E SHQIPËRISË

KUVENDI

Komisioni për Ekonominë dhe Financat

Tiranë, më 11.03.2019

Dokument parlamentar

(Komision përgjegjës)

R A P O R T

PËR PROJEKTLIGJIN

**PËR RATIFIKIMIN E LETËRMARRËVESHJES NDRYSHUESE TË
MARRËVESHJES SË FINANCIMIT, NDËRMJET REPUBLIKËS SË SHQIPËRISË
DHE SHOQATËS NDËRKOMBËTARE PËR ZHVILLIM (IDA), PËR PROJEKTIN
“SIGURIA E DIGAVE”, TË RATIFIKUAR ME LIGJIN NR.9965, DATË 24.7.2008**

I. Hyrje

Komisioni për Ekonominë dhe Financat, në cilësinë e komisionit përgjegjës, në mbledhjen e datës 11.03.2019, mori në shqyrtim projektligjin “Për ratifikimin e letërmarrëveshjes ndryshuese të marrëveshjes së financimit, ndërmjet Republikës së Shqipërisë dhe Shoqatës Ndërkombëtare për Zhvillim (IDA), për projektin “Siguria e digave”, të ratifikuar me ligjin nr.9965, datë 24.7.2008”, bazuar në nenet 32-38 të Rregullores së Kuvendit.

Për shqyrtimin e këtij projektligji u caktua relator Znj. Senida Mesi.

Për të mbrojtur projektligjin në emër të Qeverisë, ishin prezent përfaqësues nga Ministria e Infrastrukturës dhe Energjisë dhe Ministria e Financave dhe Ekonomisë.

II. Baza ligjore Kushtetuese

Projektligji i paraqitur për shqyrtim është propozuar nga Këshilli i Ministrave, sipas përcaktimeve të neneve 78, 83 pika 1 të Kushtetutës së Republikës së Shqipërisë dhe shoqërohet me relacionin përkatës sipas nenit 68 të Rregullores së Kuvendit.

Ratifikimi i kësaj marrëveshje bazohet në Kushtetutën e Republikës së Shqipërisë, Kreu II “Marrëveshjet Ndërkombëtare”, neni 121 i saj.

III. Qëllimi dhe përmbajtja e projektligjit

Qëllimi i projektligjit është ratifikimi i letërmarrëveshjes ndryshuese të marrëveshjes së financimit për projektin “Siguria e digave”, ndërmjet Republikës së Shqipërisë dhe Shoqatës Ndërkombëtare për Zhvillim (IDA), ratifikuar me ligjin nr.9965, datë 24.7.2008, marrëveshje kjo që ka për objektiv, (i) të kontribuojë në sigurinë e digave më të mëdha hidro-elektrike mbi kaskadat e lumenjve Drin dhe Mat në territorin e Përfituesit; dhe (ii) të përmirësojë efikasitetin operative të këtyre digave hidro-elektrike dhe të përmirësojë qëndrueshmërinë e furnizimit me energji në tregun rajonal.

Përmes këtij projektligji në skedulin 2, seksioni IV, shkronja “A2” “Tërheqja e shumës së financimit”, bëhet një rialokim i shumës brenda kategorive ekzistuese. Konkretisht, kategoria (2) “Shërbime të Konsulentëve dhe Trajnime përveç pjesëve 2.1 dhe 2.4 të Projektit” nga 4,700,000 SDR bëhet 5,000,000 SDR, ndërsa kategoria (3) “Shërbimet e Konsulentëve të Zhvillimit të Hidrocentraleve dhe menaxhimit të Ujit për pjesët 2.1 dhe 2.4 të Projektit”, nga 2,450,000 SDR, bëhet 2,150,000 SDR.

Gjithashtu në seksionin IV, shkronja “B.2”, data e mbylljes shtyhet deri më 31 dhjetor 2020.

IV. Shqyrtimi i projektligjit në komision.

Relatori i Komisionit, në fjalën e tij, shpjegoi se, projektligji vjen pas miratimit në parim të letërmarrëveshjes ndryshuese të marrëveshjes së huas me vendimin e Këshilli të Ministrave nr. 632 datë 26.10.2018, në respektim të nenit 10 të ligjit 43/2016 “Për marrëveshjet ndërkombëtare në Republikën e Shqipërisë” .

Projekti përbën fazën e pestë të Programit, dhe përbëhet nga pjesët e mëposhtme:

Pjesa 1: Investimet infrastrukturore të sigurisë së digave, përmes ofrimit të mallrave, punimeve

dhe shërbimeve për masat riparuese të digave me përparësi shumë të lartë, për basenet dhe mbi lumenjtë Drin dhe Mat, në digën e Fierzës, në degën e Vaut të Dejës dhe në hidrocentralin e Komanit;

Pjesa 2: Asistencë teknike dhe trajnim për sigurinë e digave përmes ofrimit të shërbimeve dhe trajnimit për EZP-në për të zbatuar një qasje të integruar të administrimit të burimeve ujore për administrimin e baseneve të lumenjve si dhe për optimizmin e shpërndarjes së energjisë dhe administrimin e burimeve ujore.

Ndryshimet e propozuara nuk prekin thelbin e marrëveshjes së miratuar me ligjin nr.9965, datë 24.7.2008 dhe as shtojnë vlerën e huasë e cila mbetet në masën 21, 700, 000 SDR, por mundësojnë që:

- Në skedulin 2, seksioni IV, shkronja “A2” “Tërheqja e shumës së financimit”, në tabelën sipas këtij seksioni, bëhet një rialokim i shumës brenda kategorive ekzistuese. Konkretisht, kategoria (2) “Shërbime të Konsulentëve dhe Trajnime përveç pjesëve 2.1 dhe 2.4 të Projektit” nga 3,650,000 SDR bëhet 5,000,000 SDR, ndërsa kategoria (3) “Shërbimet e Konsulentëve të Zhvillimit të Hidrocentraleve dhe menaxhimit të Ujit për pjesët 2.1 dhe 2.4 të Projektit”, nga 3,500,000 SDR, bëhet 2,150,000 SDR.

Ky rialokim konsiston në rritjen e shumës brenda kategorisë 2 “shërbimet e konsulentëve” për supervizionin shtesë të punimeve rehabilituese elektromekanike të aggregateve në HEC-in Koman.

Duhet të sqarohet fakti se, kontrata me konsulentin për projektin e sigurisë digave është e tipit “*Time base contract*” dhe jo me çmim fiks. Për rrjedhojë sa herë që evidentohen aktivitete shtesë në këtë projekt nevojitet edhe amendimi i kontratës së konsulentit;

Aktualisht fondet të cilat kalojnë nga kategoria 3 në kategorinë 2 me qëllim mbulimin e kostove për supervizionin e punimeve dhe financimin e panelit të pavarur të ekspertëve për projektin e sigurisë së digave, janë fonde të lira të paangazhuara çfarë do të thotë se nuk ndikojnë në ecurinë e projektit.

- Gjithashtu, për shkak se kryerja e këtyre punimeve shtesë të sipërcituara, kërkon kohë të realizohet, propozohet që në seksionin IV, shkronja “B.2”, data e mbylljes të shtyhet deri më 31 dhjetor 2020.

Përfaqësuesit e Ministrisë së Infrastrukturës dhe Energjisë e të Ministrisë së Financave dhe Ekonomisë, dhanë sqarime të detajuara lidhur me nevojën e kryerjes së këtij rialokimi. Për zbatimin e kësaj marrëveshje në tërësi është përgjegjëse Korporata Elektroenergjetike Shqiptare, si dhe Ministria e Infrastrukturës dhe Energjisë dhe Ministria e Financave dhe

Ekonomisë. Projekti është pjesë e parashikimeve buxhetore të KESH, sh.a., për periudhën 2018-2020.

V. *Ndryshime të projektaktit (nen për nen)*

Pas shqyrtimit të projektligjit, Komisioni për Ekonominë dhe Financat për qëllime të saktësimit të teknikës legjislative, vendosi:

- Preambula e projektligjit bëhet: “Në mbështetje të neneve 78, 83, pika 1, dhe 121, pika 1, të Kushtetutës, me propozimin e Këshillit të Ministrave,”
- Në nenin 2, fjala “vendim” zëvendësohet me fjalën “ligj”.

VI. *Përfundime*

Në përfundim Komisioni për Ekonominë dhe Financat, duke evidentuar faktin se kjo marrëveshje është në përputhje me Kushtetutën si dhe legjislacionin në fuqi për marrëveshjet ndërkombëtare si dhe duke vlerësuar se marrëveshja do të mundësojë arritjen e qëllimit për rritjen e sigurisë së digave të hidrocentraleve, përmirësimin e efikasitetit të shfrytëzimit të këtyre digave hidroenergjitike dhe rritjen e sigurisë e cilësisë së furnizimit me energji elektrike, me votat pro të të gjithë anëtarëve të pranishëm e miratoi projektligjin në parim, nen për nen dhe në tërësi.

RELATOR

Senida MESI

KRYETAR

Arben AHMETAJ